أحمد حامد أحمد

أشعار بالعامية المصرية

الطبعة الأولى يونيه 2018



بطاقة الكتاب

عنوان المؤلّف: مخاض القصيد

المؤلِّف : أحمد حامد أحمد (أحمد أبو عاصم)

التصنيف : أشعار بالعامية المصرية

رقم الإيداع : 11311 - 2018

الترقيم الدولى: 1-22-6656-977-978

عدد الصفحات : 116صفحة

رقم الإصدار الداخلي: 206 - الطبعة الأولى يونيه 2018

الإشراف العام على جمعية تسهيل الطباعة الشاعرة سميرة محمودى جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب الابموافقة كتابية وموثقة من الموالف





إهداء

إلى أبى يرحمه الله ،
وأمى متعها الله بالصحة والعافية ،
ثم إلى زوجتى الغالية
وأبنائى الأحباء،
وأخى أستاذ اللغة العربية:
دكتور أيمن حامد .
وكل صاحب إحساس وتذوق للشعر عامة ،
ولشعر العامية خاصة.
أهدى هذا الديوان

أحمد أبو عاصم

مقدمة

فى زمن زادت فيه التحديات، وكثرت فيه المشكلات، كان لزامًا على كل صاحب فكر ورؤية أن يكون له دور ولو بسيط، فى محاولة للمساهمة بالإرتقاء والتسامى فوق تلك التحديات والمشكلات.

ولا يختلف إثنان على أن الشعر على مر التاريخ ، والعصور كان له أكبر الأثر، في الشعوب والثقافات المختلفة. سائلاً المولى عز وجل، أن أكون قد ساهمت بجهدى المتواضع، في هذا الدور وتلك الرسالة.

وعلى الله قصد السبيل.

أحمد أبو عاصم



نبع حنية

وكل ما اجي ازعلها ألاقيني بحنلها لضحكتها ويسمتها واحن للمسة من إيدها تحضن قلبي بجفونها تغنى ... لحنيا ... المنسي تحلي يومي عن أمسى تسند ضهري وتقوي تنور عتمتى وتضوى أشوف الدنيا بعنيها أنسى همومى وياها يروح الهم من قلبي

مجرد عيني ما تشوفها تصحى فيا إحساسي وتغنيني الدنيا ما هي دنيتي وناسي ونسمة تطرى أنفاسى بحب الصبح ف عنيها وتندهلي تصحيني أعمل نفسى مش سامع عشان تلمسنى بإيديها أحب اسمعها تندهلي كأن إسمى متلحن واجرى عليها بعيوني يرفرف قلبي وجفوني صباح الفل يا قمري صباح الورد يا عمري

متجهز	ألاقي فطاري
ا تتبروز	وضحكة روحه
وانا مبوز	راكون صاحي.
وياها	أفك بسرعة
بدعواها	تباركني
وانا با فطر	تسليني
متغير	والاقي الطعم .
تشاركني	لو مرة
فیه سکر	كأن الأكل
کنه تکوینها	واستغرب
ربي خالقها	واسبح
كل أوصافها	وأبدع
یا رب خلیها	واقول
هي	دي کل دنيتي .
يا نبع حنية	

خسارتك ياريف

یا ریفنا خسارة خسارتك یا ریف دخلنا الحضارة طورنا الرغيف بقينا نجيبه خلاص م الطابونة غسلنا عادتنا بليفة وصابونة وزرعك يا ريفنا صابه الفساد زودنا الكيماوي بدال السماد ونوم الضماير صاب العباد ولجل الفلوس كله تماد وقطر الشهامة عدى وفات وسحرك ياريفنا صار ذكريات رقصنا ف سبوعنا بطلنا المغات وحنة إيدينا بقت تتوهات

بطلنا الطرمية وغيرنا توينا نسينا الأصالة وطبعك يا ريفنا بنينا العمارة مكانك يا غيطنا هدومنا القديمة بقت م التراث وعفش ف بيوتنا من أحدث أثاث ولادنا وبناتنا ماشين ع الموضات وسبهرو الليالي قدام الشاشات وفيسنا وفيسكو وتويتر يغرد شاشات الماسنجر يوماتي تعود أسامي ولادنا صابها التطور والكل تماهي بدعوى التحرر بدلنا الأسامى شقلبنا الأمور باتعه بباتى وناعسة بنور مخيمر بميمي بضفيرة ف شعور

بنطلونه اللي ساقط مبین حاجات وبوكسر بوردة وحيائنا اللي مات ومشيه بميوعة زي البنات وينضغ لبانة وكلامه بنعومة وأهله تغافلو ولازمو السكات وشريه السجاير وبانجو وحشيش طريق الندامة لو رحتو ما جيش وصمة ف حياتي وشبهة ف فيش يعجل مماتى أو بؤسى أعيش يا ريفنا ومدينة وشارع وحارة حياتنا أمانة وصحة وشباب صحو الضماير يعود اللي غاب مواجهة مع النفس بانفس كفاية يزبادة

ذنوب وغرور آثام ومعاصي معتادة وخفاء مستور ف وسط الخلق بعبادة تملى وقور رضيت م الناس بشهادة وأرضك بور رسمت التقوى بإجادة سبكت الدور ملكنى شطانى بسيادة حاوطني بسور طاوعت لأمره بقيادة وليه مأسور سلمت النفس بإرادة ذليل مكسور

وبسوف ليه وبتمادي !! عايش مشطور مش لاقى راحة وسعادة ف ساقية بدور وتمللى النفس وقادة لفعل شرور قبلت الشهوة والمادة واكون مشهور ولأى نصيحة وإفادة أقول معذور نسينا الآخرة يا سادة وموت وقبور بمجد الدنيا وإشادة بزیف أو زور ومالكش فرصة وإعادة

تعيد الدور هزيمة الشر ب جهاده قوم يالا وثور تنول الحسنى وزيادة تكون مسرور

خداع

اطعن يلا بغدرك وامشى ما انت بتغدر ولا تندمشى كان يوم إسود يوم ما قابلتك كنت ساعتها ف حالة ضعفى جيت بسهولة واحتلتني يومها أنا فاكر عقلي عارضني إتمردت رغم شعوري سحر عنيك راح يتعبني ويسلسلني حبيت أهرب قلبي خذلني

هي إشارة وجيتك أجرى جيتلك أحبى وانا متغمى كنت النجم الأوحد ليا بتورينى الصورة بعنيك مانع عني الرؤية الواضحة لاغي كل الكون حواليا كنت آسرني من غير قيد وانا باتعذب وانت واهمني إني سعيد کل منایا ف وقتي الحاضر إنك عني تبقى بعيد

مخاض القصيد

عندى قصيدة لسه جنين وخايف عليها تموت ف المخاض من يومها حزينة وطالعة بأنين من كتر المآسي حاسس بامتعاض قلمی وحبره من دمی بینزف وعين القصيدة دموعها بتزرف واحاول أجود من أجل السياق وخوفي جنيني يجيله اختناق من عسر الولادة لازمها إعادة صور الأشعة ماليها السواد بتقول النتيجة تأخر والادة جنينك وزرعك لازمله السماد

من سحر المعانى جبت الكيماوي ساقيت الحروف بعذب الأغانى وقلمى اللي عاشق كتابة السطور لجل ما تطرح لحنى ومقامى بحرفي وقلبي نظمت القصيد يعجب قريب ويعجب بعيد وحرفى كفاسى وزرعى وغراسى يطرح محبة لأهلى وناسى طرحت بشاير قصيدة بشطاير بس الحقيقة لازمها نضوج أعدت الكتابة واوزن واعاير قولى بصراحة لو فيها عروج

قول ياشاعر

قول الشعر ما دام ف الخير حلق ف سماه رفرف كالطير أبدر ف حروف تطرح بألوف واروى الأشعار بجميل معناه حرفك مسئول وجزاه هاتنول لو زین یا هناه بالفرح معاه وإوعى الإبداع تتجر وراه والفن يسوقك للإسفاف واعمل لحروفك سور وياه

ابنيه بايمانك والأعراف واوعاك ياعزيزى تتخطاه واعلم إن السور دا إزاز إعملله حماية 200 برواز إسرح بخيالك بالمعقول واسبح ف بحور الشعر وقول بس إوعى تعافر ف الأمواج وتجدف يوم عكس التيار يرميك السيل جوا الأفلاج وتوه وياه ف دروب ومسار قوم صحح يالا النية يا خال سمعني وقول أجدع موال وادعى بالخير والتقوى ونور بيا وبيك تتهد جبال

تمرد

يا عمري اللي فات والحنين للذكريات وغطان قلبي اللي مزروعة بالآهات وسنابل حب مبدورة ومسقية ومروية أنين ودموع يا بسمة حلوة ف الصورة وضحكة بزيف وربيع عيشتو جوايا لاقيته خريف حاولت اداري أحزائي

لاقيت الضعف إنساني وفتنى قلبك الملهوف أتاري اللهفة خداعة فتحتى ف قلبى شراعة وحاسبة الحب بالساعة ساعات تخاطيف وإحساسك مانيش حاسه لعبتى الدور بحرفية رميتي الطعم حنية ورجعتى تحنى للماضى وغلطتي ف إسمي مع إسمه سامحت كتير واقول هفوة قالولى خاينة بتقابله اكدبهم وانا راضى ومین منا مالوش ماضی

وكان له معاصى أو نزوة وطمعتي ف نبل أخلاقي وغرك فيا تغفيلي برمجتي كل تفكيري وعشت سنين ف أوهامى وأحبابي وأصحابي غيرتى ليا تصنيفهم وف خانة سودة حسادي بدلتي ف عيني أوصافهم وأحلامى بقت كوابيس أشوفه بعينى متفسر جبروتك كما المتاريس وقيد ف رقبتى مشدودلك أحاول أفكه مش قادر خطاويا بتتعسر

وإنا الأيمن بقيت أعسر واحاول اشب عن طوقى تزيدى القيد وإحكامه ونزف القلب بقى عادي ومتعة ليكي أتعذب يا مرك والمرار زادي بانام على جمر واتقلب ومسلوب القوى فيكي وقاري القسوة ف عنيكي كرهت الضعف من قلبي قتلت القهر جوإيا ونويت إنى أتمرد حطمت كل أسوارك وشربت الباقي في دوايا من دمی عملت تریاقی

وأبطلت كل أسحارك نزعت قلبي بإيديا وأطحت بكل أشواقي ورجعت حر من تاني أتاري الحب جوانا نعيشله عبيد

مجذوب

الحزن ليه معشش ف القلوب وليه الفرح ضيف مسلوب إعمل حساب العيب واوعى تكون معيوب ياللي تقيدو الشموع طولو الشمعة صوابعي لما انطفت نزلتو ليه دمعة أنا قلبي ياما اتحرق وناركو مش والعة القسوة ليه ف طبعكم والودن مش سامعة

جنينكو عمره اتولد قبل الأوان بسنين !!! والجهل ليه ف عرفكم كله فعايل زين قام الولد يمشى ولسه ف اللقه قولتو عليه مبروك وبقاله ميت زفة كبر الولد مجذوب وإسمه ذاع صيته بعد سنين قتلوه للقبر بيه جريتو وقولتو نعشه طار وعملتو زفة وزار والعقل عدى وفات

وينيتو ليه مقامات لبستله طرطور وخدتو منى نذور سبوبة مفتوحة سئنة ومندوحة وسيبتو الفروض ضايعة بقت البدع شايعة جهالة ف جهالة رقعة ف سيالة طوحتونى معاكو خاتوني وياكو ومشيت ف موكبكو فاكرني محسبكو لما لاقوني ببص فجأة طردوني ... !!

ورمونى بره الخص وقالو على تهمتي فتح ف مره وشاف ...!! وقلبه بقى بيحس وخالف الأعراف

كيلو بامية

يالا نعمل كيلو بامية بس نرضى بالنتيجة مش هتاخد منا ثانية حتى نعرف الحقيقة مین ما بینا راح یکون أم هاتخلف الظنون وكل واحد جاي وحاسس إنه فارس الميدان رغم إيده كت ما بينا بس عقله ف حتة تانية من زمان وهو دایس من سنينه ألعوبان

كان عاجنا وكان خابزنا ورده كان شوك ف إيدنا الإيدين متجمعين والقلوب متفرقين والنفوس متحفزة والعقول متوترة وكله نافر الوتين يالا نقلب الإيدين فجأة واحد انسحب وقال .. لابد محكمين حتى نمنع العتب من معارضة وشكاكين وخد وهات ومفاوضات وندوات

ومباحثات ومشاكسات إتفقتا بشروطات راح نجرب ع القديم قلبة واحدة ف السليم بس مین ... راح یقول كلمتين بالتمام ... (كيلو بامية) بكل حزم وانسجام حتى تبقى بالأصول كل واحد قال أنا وإنه أولى مننا رجعنا تاني واختلفنا والشقاق دب بينا اختلفنا

حتى قبل ما نتفق والإيدين إتفرقت والإيدين إتفرقت بس بعد مشاورات ومناوشات ومعاتبات قررنا نعمل كيلو بامية من سكات بس الغريبة لما قلبنا الإيدين كل إيد كت على كفها والخيبة جت عل وشها

رضاك يا اما

أنا خبت مره ما كفاية مرة تعباني لسه وف حلقي مره أبويا غاب قبل ما أقوله سامحنى يا ابا عن عمري كله ویا ریتك یا ابا تكون سامعنی وتقولي إنك كنت مسامحني فاوعي يا اما تغيبي عني قبل یا اما ما ترضي عني وإن رضيتي محلى رضاكي ما انا یا اما برضه ضناکی دانتی یا اما شمعة حیاتی والضيا لعمري اللي آتى

وإن غضبتي مرة عليا إغفري وسامحي يا غالية إغفري وسامحيني وارضي ارضي يا امه أرجوكي ترضي وإدعيلي يا اما إن مت قبلك إدعيلي يا اما من جوا قلبك إدعيلي يا اما من جوا قلبك

أبويا غاب

أبويا مات ... بس الحقيقة جوه القلوب عايش بجد ده مش بس رأيي عشان بحبه تعالى واسأل أي حد أى حد م الجيران أو حتى قابله من زمان أوحبايبه أو معارفه واللي كانو تملي قربه ناس كتير ما أقدرش أعد بجد ساب تأثير كبير في الصغير والكبير وكل ما افتكره أحبه

أحبه أكتر م اللي فات وما أقدرش أقول إنه مات أحب أقول إنه غاب وإنه كتير من فضله ساب وأي وقت يتجاب ف سيرته ولا مرة عنه حد عاب وعلم كتير حفظ الكتاب ناس كتير من غير حساب مهندسين وكمان دكاترا أغنيا أوحتى فقرا ف المدارس أو ف المساجد وكتير أشوفه راكع وساجد يدعى ربه شاكر وحامد ماهو إسمه حامد على مسمى عابد لربه مهما ألمَّا

يقرأ كتابه وحاله أسعد عرفت مين هو أبويا ؟ أبويا حامد وانا إبنه أحمد

فراق

إسمعيني واعذريني والعنى قلبي اللي حبك كنت ناوي ما اجيش معادنا بس تمللي قلبي يضعف ینسی جرحه رغم ألمه يفتكر أيام خوالي ف الأماني كان بيسرف کان مناه يكون بقربك كان برئ ولسه أخضر

كان حمول للهجر يصبر من وعودك ليه بقربه كله راح وف ثواني وابتديتي حب تاني وقلتي لازم نفترق هى كلمة وجاي أقولها رغم إن ... قلبي حبك بس عقلي بيلعنك واتمنى ربي يسعدك

نظرة عين

كل معارفي عارفينها زی ما هما عرفونی وفهمو النظرة ف عنيها زي ما هي ف عيوني ومهما حاولت يوم أخبي أشوفها عينى تفضحني وجسمي كله يتوتر واعرق ... كأن الدنيا بتمطر واسخن ... واحس إني بردان واشرب ... ويفضل حلقى عطشان وكل ما تيجي وتقرب يتنفض جسمى ورؤيتها تنسيني حروف إسمى

وافتكره لما تندهلي وصوتي ينحاش ما يطلعشي واخاف إنها تمشى وكلام كتير با كون حافظه وشعر لیلاتی با کون ناظمه كله ف راسي يتبخر وليه يا لساني تتأخر ..!! وعيونها ليا تستنظر قبل كلامى نظرة عين أتاريني حتى للنظرة عایزلی سنین

مصارحة

ساعات الضحكة تخذلني وبسماتي تعاندنى والاقي شعوري ... متبلد ودمي حاسه متجمد وفجأة ... الاقي دمي يفور والاقينى ... عصبي واثور بقیت مش قادر ... اعرفنی واحاول إني أفهمني لكن مش قادر مش قادر ... أحل مشكلتي وأيامي تزيد حيرتي وعقلى تمللى متحفز

وإنا للقلب متحيز وساعات ... أتمنى أغيرنى أو امسح كل ذاكرتي واعود مولود ... من الأول واربینی واعلمنی واضربنى وأدبنى واصحح كل أخطائي وعلاتي وزلاتي وامحى كل هفواتى وساعات اتمادي ف الفكرة واطاوع نفسى ف الهذيان ألاقي النسخة تتكرر ومهما الوضع يتغير واحاول إنى أبدلني ألاقي حقيقتي جوايا

فيها كل أنواعنا وأخطائنا ... بني الإنسان ومین منا ... کان معصوم يعيش عابد يعيش ... زاهد يقاطع كل متع الكون عن الشهوات يعيش محروم ويعصى شيطانه والمكنون وربك خالق الأكوان عالم بينا وأحوالنا وقادر كان يوحدنا وهي مجرد الكلمة كن فيكون

نص مفقود

مسير الحي يتلاقى والاقى نصيا المفقود واقعد قاعدة يرواقة وحرفى ينجلى ويجود واكتب نص متسلطن بنبرة هادية ويطنطن وفجأة يعلى ويجلجل يحي الهمة ويشعلل نص يولدني من تاني یعدی کل أزمانی يبنيني وانا الباني يحكى نبض وجداني

نص يبقى زي ابني سنين فيه وانا بابني وكل شوية يتأجل وازیده بحرف یعجبنی وكل ما انوى واتحفز واظبط نفسى واتجهز الاقي خوفي يمنعني وشطان الشعر يخدعنى اتعوذ منه وأتمتم ألقاه بالعند متحتم ويتحداني بغروره يحوشو عنى ما انوله أزيد من عندى على عنده ويخرج حرفى عن صمته واسن حروفى وأبارزه

واسل قصيدى من غمده واصارعه بكل أفكارى واتحصن جوا أشعاري واشجع حرف متخاذل وكان للحرب متنازل واعيد ترتيب كلماتي واحظم صمتى وسكاتي واقوم وافرد مداد قلمى واحرر نفسى من كسلى واجود حرفى من نغمى واحقق جزء من حلمي واجيب الباقى ويايا يزيل بالأمل همى

حبيبي يا محمد

ف البداية لابد اقول صلي يا مسلم تنول صلي واذكر الإله واطلب الجنة ورضاه وكل ما تصلى مرة ربی ها یصلی علیك بس مرة جزاها عشرة شوفت فضل رسولنا إيه ربه زانه وزاده رفعة وذكره في آيِّ الكتاب وقالنا صلو عليه قدره إنه يكون يتيم

لجل ر به یأدبه علمه ربي الكريم بخُلقه العظيم يوصفه نقى قلبه م الضغائن نزهه عن كل شائن بالهداية نوره دربي يكفى إنه ف عين ربى جاء رحمة للخلايق إنس ... جن ... والدواب رحمة حتى للحجر لكل معضلة جواب وحن ليه ... حتى الشجر معجزاته كات كتير شكوى جاتله ... م البعير ولما حطو ... ف أكله سم

ربه نطقه ... وحذره والسحابة ... تضلله مهما يبعد ... تتبعه والشجاعة ... ف القتال يبقى أول الصفوف قبليه بشهر بتسبقه يرتجف أعداؤه خوف الحصى ف إيديه يسبح على صوته بيه وصرح القليل من زاده يكفى والطعام ف إيديه يزيد تلقاه یکفی بل یفیض وريقه بلسم كان بيشفي باللسان كان فصيح وبكلامه كان مريح

عرقه كان ريحته مسك من میلاده عصمه ربه أي شرك حتى قبل الأربعين سن تكليف الرسالة كان قدوة لكل عين إتعرف دايمًا بصدقه واتوصف إنه أمين ولرجاحته وحكمته قبلو رأيه ف النزاع ولشرف وضع الحجر وبعظيم المعجزات جاء رحمة للبشر قرآن ربي والآيات ولأجله إنشق القمر

صلو عليه وسلموا تفلحوا وتسعدوا

مناعة

قلبى جرحه ونزفه زاد من سنين الهجر داب وانت قادر ع البعاد كان بنبض الحب عايش يوم لقا وكتير غياب أمله إن القسوة تبعد ليه تمللي كنت تعند ليه ساقيني المر كاس ليه سماك كانت بترعد والبعاد كان انعكاس الكلام دايمًا بلوم ولصفائى تكون غيوم

بيعت كل الكون عشانك فين وعودك ؟؟ فين غرامك ؟؟ فين رحيق شهد ف كلامك ؟؟ دوقته مره معاك ف يوم كنت ليا نجم عالى يغنيني عن ضي النجوم كنت قمري وبدر يضوي والمدار والسديم كنت ليا ف عيني نني والقصيد عنك بيروى ليه خالفت حسن ظني ليه تبيع بالرخيص والأماني الحلوة بينا كنت ليها وبيك حريص

شوفت منك غدر واضح وبغرورك جاي بتعلن إني باعفي كتير واسامح بس ناسي إن سمك فيا سارح ومن كتر جرحي منك ناسيتني حبك والوداعة وبقى عندي فيك مناعة

منك لله

ياليل الحزن فين أخرك وإمتى الفجر ها يشقشق وليه القسوة فكراني وتمللى الفرحة نسياني حاولت اداري أحزاني من غدر حبيبي اللي جافاني واداوي القلب من جرحه لقيت الجرح جواني وجرح العشق لا يشفى لو عاش العمر ف المنفى يظل الجرح فيه معلم وياريت القاسى يستكفى

هجرنى حبيبى ونسانى من بعد وعوده خلاني أعانى وحده ليه طالت .. ؟؟ سهرنى وعينه ليه نامت .. ؟؟ وعشرتنا عليه هانت وليه أيامنا ما دامت .. ؟؟ برغم الحب والأشواق ما عاد بينا سوى لفراق دَوقِته ياما حنية سكنته قلبي بنيّة طار ولاف على غيرى وهجر العش ليه طيري .. ؟؟ وكان العش ليه وارف على راحته باكون عاكف وكان صدرى له وسادة

مثل دوره بإجادة وعملت نفسي مش شايف حتى الإسم ... بدلته وشكلى ورسمى شكلته ورضيت وكنت ليه قابل وأخطاؤه وسوءاته كنت عنها متغافل ومشيت وراه متغمى بوهم ساحبني من حلمي وسراب بصورة وردية سامحته كتير من حبى وداريت الهم من غلبي جرحنى وجرحه زاد ألمه خلاص بزيادة من ظلمه ماعدتش باقى ع الماضى

وقلبي رافضه مش راضي من كتر القسوة قاسيتني لحظات الفرح ناسيتنى ونسيت الحرف من إسمك ونسيت الوصف ف ملامحك وكلمة أخيره أقولها لك منك لله منك لله يا ظالمني

سر الصنعة

ملعون أصلك ملعون فصلك إمسح لو تقدر اللي كتبته من كراستك حتى السطر الناقص من كتاباتك محذوف بعده أربع تسطر لو هاتعد الخامس بعده کله مزور اكتب واشطب واشطب واكتب مش راح اصدق أي كتابة

أنت نهايتك قرطاس لب ما انتش أكتر

ما تخافیش

تخافى ليه وانا ولدك ..!! وصعب ظروفي مش ذنبك ومهما الدنيا ... تعباني هايفضل حلمي من حلمك سنين العمر هاتعدى واحافظك على ودى وحتى لو إنت نسياني هالون ثغرك الوردي وازُود عنك وعن داري ولو بعتى ... أنا شارى وعايزك تبقى فاكرانى ياقمري وشمسى ومداري

صبرت ولسه هاتصبر واعدي المر لو أكتر وحضنك ليا أوطاني وبكرة الفجر هاينور واوصي ولدي يحميكي يصون عرضه ... أراضيكي ويبني يعلي ... بنياني تهون روحه ويفديكي

التوبة

ياللي بتعصي ربك توب بزياداك يتر ذنوب قبل ما تيجى ساعة الموت وتضيع الفرصة عليك وتفوت نضف قلبك من معاصيه وادعى لربك أن يهديه جاهد نفسك يالا وحاول والصالحين دايمًا زامل أنصح نفسي وانصح غيري أفعالي معايا فيها مصيرى لما نتوب من معاصينا ربنا يقبلنا ويرضى علينا

إنوى يالا التوبة بسرعة وإنوى كمان عدم الرجعة توبة نصوح وابكى ونوح ممكن نَفُسك فجأة يروح كل واحد فينا بيعصى وعمر ما ربك مرة بينسى بس ذنوبك ممكن تُمحى لو بالتوبة ... كسبت الفرصة مین منینا یضمن عمره ولاً بيعرف ... أجله ووقته بس شيطانا ... لينا بيسوف يالا استغفر واوعى تولف إرجع يالا وانوى التوبة أصدق فيها ... تكون مقبولة ربك زيه ... ما فى رحيم

بس تجيله بقلب سليم اوعى تأجل وقت التوبة لما شيطانك ... يأجلهالك تبقي بقيت ف إيديه ألعوبة ويبقى بسهمه صابني وصابك

بحبها

بحب النظرة ف عنيها واحاول إني أجاريها ألاقي الورد ف خدودها وريحة المسك من عودها واحب دلالها ف ردودها وبحب كل أوصافها ألاغيها ... تلاغيني واخاف عليها من عيني أحابي عليها برموشي واغطى عليها بجفوني واعيش وياها ف الأحلام زى رواية ف الأفلام

لمسة إيدها تسحرني تدوخني وابقى عايز الإنعاش واتمنى الوقت ما يفوتناش يطول الليل ويانا ونجومه تبقى سلوانا أنسى معاها كل الكون تكون ليلى وأنا المجنون سحر عنيها يخطفني ف بحر غرامها تحدفنى بلمسة من خدها الفتان تدوبني كما الولهان واقطف وردم البستان

إحساس

إحساسي بيك وانا بين إيديك إحساس أمان غرقان ف بحر من الحنان إحساس بنشوة وارتوا إحساسي طاير ف السما وانعدام كل الوجود وانا وحدى عايش ملحمة وف ودني سامع لحن عود إحساسي دايمًا باشتياق وانا لسه حتى بين إيديك إحساسى دايمًا باحتياج

إحساس بخوف م الفراق ما انت كل الكون ف عيني نظرة منك بتساعيني نظرة واحدة من عنيك الحياة تسري ف وريدي

وجع وندم

قلبي الموجوع انفطر ودخلت حالة الخطر بانزف بقالي سنين مكتومة فيا الآه هايم وليلي حزين يارب عبدك تاه وضل طريق مولاه من ذنبي حملي زاد وقل عندي الزاد طمعان ف غفرانك واقف على بابك مستني وكلي يقين

تغفرلي معاصي سنين بالرحمة تشملني أحسنت فيك ظني إرحمني يا رحمن أنا عبدك الندمان

آهات و أنين

عاشق للحزن الخمسيني واندهله ليلاتي يغنيلي مواويل وآهاته بتشجيني ومعاها تضوي قناديلي مع صوتى الطالع بأنيني الفرح بيوعد وبيخلف والجرح ف قلبي ما زال ينزف وسنيني خلاص ف أواخر الساعة الرملية كلماتى مازالت منسية یا من تنوی تأبینی عجل يا صديقي المرثية

إنطلاقة

لما يبقى القلب صافى واما يبقى النهر وافي قوم وأذن ع الفلاح واسعى ف الأرض البراح وابدر الحب بسماح إجمع اللي فات ف حفرة وادفنه من غير نواح يبقى ماضي ليك وعبرة واوعى تنكأ الجراح إطلق العنان لفكرك بس إيدك ع اللجام إوعى يجمح مرة فرسك

زي ما قالو الجدود راح أكرر ليه واعود اللسان لو هينته هانك أما لو ها تصونه صانك صدق حرفك راح يزينك وإدعى ربك أن يعينك خلى حرفك كالحمام يبقى طاير ... للسلام عالًى صوتك بالحقيقة يبقى خافت ع الكرام كل كلمة وليها معنى وكل وقت وله أدان هد سور الصمت واعبر قوم وعلم ع الحيطان بس يبقى علام معلم

زي حرتك ف الغيطان
سل قلمك زي سيفك
يبقى ماضي وغمده فاضي
خليه مشهر ع اللئام
خلي نقدك بالأصول
راح تلاقي ليه قبول
وتتفتح لك العقول

طول عمرنا

طول عمرنا ماشيين ع الخط المستقيم طول عمرنا متعوذين من الشيطان الرجيم طول عمرنا مخضوضين ويسرعة نتف ف عبنا طول عمرنا وطول عمرنا وطول عمرنا مشاكلنا بتهدنا وتمللي بتهزنا وتمر برضه ساعات

نتجرع المر كاسات نشرب نقول صابر نسمع نقول حاضر شعب ما لوهش مثيل وأساتذة ف التمثيل بطيبة أو تطبيل ما هو كان إسمنا طيبة حضارة وفراعنة ف السخرة أبدعنا حضارتنا مبنية بدمانا مروية واخدين على التضحية وحقيقة أو أمنية باقين كما الوتد أرواحنا ليها السند

مكتوب علينا الشقى وقلوبنا متشوقة لدنيا فيها براح وليل ف آخره صباح وصبح ما فيهش ضباب رايق ما لوهش عباب ياصبح قرب ما تبعدش وافتح لنا طاقة ووعود ما توعدش دي قلوبنا مشتاقة

أنا إنسان

إنسان وغايتي أعيش وما ليش ف التهبيش قالو عليا غشيم وتفكيري كله قديم يا ناس أنا إنسان من صنعة ... الرحمن ليه عايزني أكون بالدنيا أكون مفتون والأخره ليه أبيعها وبذنبي أضيعها عایش کأنی غریب وزمانى حاسه عجيب

موازينه اختلت وسنيني فيه ملت ما عدش ليا ... صحاب غير ورق ... وكتاب أكتب وأشكيله يحكيلي واحكيله يسمعلى بإنصات ويخفف الآهات غرام ف قلبى قديم من غيرهم أبقى عديم فايدة أو قيمة زي سراب أو غيمة تمر وتعدي لا تنور ولا تضوى وعشان أكون ... إنسان لازم يكون لي بيان أو حتى أسيب عنوان وعنواني أنا إنسان

ما تشيلش هم

مرة لاقيتني باكلم نفسي يعنى كأنى واحد صاحبي واخد وادي بيني وبيني واناقش نفسى بس ف سرى نفسى قالتلي عاجبك واضعك قلت لنفسى ماله وضعى أيوه عاجبني فكك مني وضعي أحسن م اللي ف سني نفسي قالتلي إوعى تخبي وضعك مزرى بص لنفسك وسدة نفسك عايش زى الجثة الهامدة

وضحكة وشك باقت جامدة حتى الصحة مش ولابد وخطوة رجلك مش بتمد ولبسك كله ألوان باهتة والتسريحة قديمة وثابتة فين الذوق وفين الحس حتى اللقمة من غير نفس كل الوقت قاعد بتفكر ومن الهم جالك السكر فين القلش وفين قفشاتك واللمة الحلوة ويا صحابك فين الضحكة اللي بصوت عالي نفسى ترجع تضحك تانى إرجع تاني ودلع نفسك حتى مرة كده من نفسك

عمر الهم ما يصلح حال ولا بيكسب أبدًا مال إرفع إيدك وإدعي لربك ربك وحده يفرج همك

عایش بیها

عایش لیه ؟ عایش بیها كل نبض القلب عشانها يعلا ويوطى من إحساسها ماليا حياتي حب وبهجة كل مشاعرى وهي المهجة وقت سعادتي هي سببها وف أحزاني تخفف عني أيوه أنا بيها وهي مني زى النسمة ناعمة جميلة تنشر فرحة وبسمة رقيقة وساعات ريح عاتية رهيبة

رغم الرقة البادية عليها بتوترنی وبتغيرني وبتصبرني وبتحيرني أأقرب منها ولا اجافيها بس حبيبتي تغلب حيرتي ما هي كياني ونبضي ماليها وساعات يأسى يخنق صوتها وبسكاكينه يقطع فيها بس أملى إنها تضوى أقيد الشمعة قبل ما تطفى قبل اليأس ما يقضي عليها ويفرق بيني وبين كلماتي وجمر قصيدي يجي يحييها

هی دي مصر

ما اعرفش ليه دايمًا كئيب وحاسسني وسط الناس غريب ساعات احب اعيش وحيد واتمنى اسافر لمكان بعيد مع ناس جديدة وعيشة تانية وفجأة احس بالحنين لذكريات ما لهاش مثيل لما كنت اواسى جاري

ويواسيني يموتلي غالي ألقاه يجيني ووقت فرحى جنبى وصاحبي وقت المشاكل ألقاه ف ضهري مشاكلنا واحدة وهمومنا واحدة واعيادنا تحلي بينا المعايدة وف المواسم أكلاتنا حلوة أبعتله طبقى ويرد زيه وصوت أذانا ونور بمدنا

زينة الشوارع خطب الجوامع كورنيش بلدنا ف حر صيفنا وأكل الجيلاتي وكباب وحاتي عربيت بليلة ف برد طوبة حمص وترمس وفول مدمس وزيته حار وبصل أخضر على الفطار وشاي منعنع على القهاوي وصحبة حلوة عند الفيشاوي

وكتير غدانا بيبقى كشري وساعات بتقضا طعمية سخنة ياسلام عليها لو جوا فينو جميل بسمسم من أي فرنة وفقيرنا دايمًا ربك يعينو أرجع واقول ياسلام يا بلدي والله يابلدي مالكيش بديل

مانيش طرطور

وكل ما مرت الأيام باعرف إنى لسه فاضلي كتير ولسه ... محتاج لعلام واحاول اثبت الخطوة تكون قدام واحاول أفهم الفكرة من العايشين على الأحلام ألاقي الحلم يجاوبني لكن ف منام ياخدنى لدنيا مسحورة واشوف الصورة بالألوان

والف بإيدي بنورة تورینی زمان تانی وشوش تانية ماليها ... الحب والبسمة تحب تعيش ... ف أزمانها لا فيها ... حقد ولا تجريح وتعيشها بدون تصاريح زمان جای علی کیفك ما فيهش لزوم ... لتصنيفك زمان حر... مافیهش قیود بلاد مفتوحة ... للزاير لا فيها حدود ولا بسبور ومش محتاج تعدى السور ما فيش فيها حد حقود ولا جارك ... بعينه حسود

لا اتخانق ... ولا اعادى واروح الشغل ف معادى زمان ليا ولولادي أعيشه بحب ... لبلادي واكونى سيفه على العادى أقدم روحي ليه راضي يحسسنى بقيمتى فيه يراضيني وانا أرضيه مانیش عایز زمان أساطیر ولا عايش ... ف دنيا الغير أنا طلبي قلوب صافية قلوب بتحب مش جافية قلوب بتحس بالرحمة قلوب بالحب ... متلاحمة تقول الكلمة ... بتداوي

تحلي كل أزماني تكون عنوان لأوطاني مانيش عايز يكون لي قصور تقول فَقَري ... أقول جايز أهم حاجة إحساسي مانيش طرطور أهم حاجة إحساسي ما نیش طرطور

لوحة ناقصة

حد شاف ..! حد شاف حرف تایه ..!؟ حد شاف ..!؟ أوقصيدة ناقصة بيت حد شاف !! أو ديوان جنب حيط حد شاف ..!؟ ولا شاعر لما قال يقرا نصه م الشمال وهو كاتيه م اليمين بس كله كان أنين حد شاف ..!؟

حد شاف وزنی مال أو سرحت ف الخيال كان قصيدي زی غیطی أبدر الحرف ب أوان واغزل القصيد واحنى بس عمره ما كان ديوان قلت یمکن عیبی منی قیمونی یا أهل فنی أنا بكتب اللى حاسه وصوتى عالى أو بهمسه حرف نابض بالمعاني من واقعنا مش أغاني حرفي ... لحني ... ليا عازف بالجراح من قلبي نازف

عمرى ما قلت ... لازم اكتب وبجميل الشعر أكدب بلاقى الحرف يندهلي وانا سارح يفوقنى وانا نايم يصحيني وانا ماشى يوقفني شاغلنى ياما وبا شاغله وانا رايق ألاقى الحرف يتعايق يسوقنى رغم أنا سايق يهنيني يفرحني يملا دنيتي بهجة بحرف يرسم البسمة وااااااه وآه من حرفی لو مهموم

يعاني الحزن أو مكلوم بلاقي الشمس بتغيم وانا ساكت ومتكمم يقولى اكتب إتكلم بزيادة حروفك الهابطة وغزلك ف عجوزك الشامطة وهى سايقة علينا دلال ولا واقفلنا ف محطة لا بغنوة ولا ب موال وما بين البسمة والقسوة ها كمل لوحتي والرسمة

يا حلم إمتى تتفسر

أنا عايش ومش عايش باوصف حالي ... ما بغنيش واتمنى قطرى ... ما يفوتنيش بس القطر جای دایس ورغم جرأتي وباقايس نصيبي إنى أستنا لحد العمر جاب أخره وإمتى بس ها تهنا وزمان مش لينا بمساخره وعمري حاسه ف الإنعاش ووقتى كله راح ببلاش وجودى ما عدش ليه لازمة

(أشعار)

حياتي صورة مش كاملة ناقصها كتير من التفاصيل وإنا فاشل ف التمثيل وقالو الدنيا دى مسرح ولو ناوی علی مطرح إوعى تخرج ع المنصوص ولاً رجلك مرة تغوص خليك عايش كما العايشين ودور فيها مع الدايرين وهیص یا سیدی کما الهایصین وقوم واوصل مع الواصلين اوعى لثانية تتوقف وزی ما سقفو ... سقف حاولت وانا صغير حاولت افهم

وكان عشقي ف المرسم رسمت الصورة من قلبى جميلة وحلوة من ظنى ماليها الفرح والبسمة أصبح بيها واتمسى مع الأيام بقت باهتة وضحكتها بقت ساكتة وألوان ... كتير ساحت تفاصيلها ... كمان راحت غيرت غيرت مرة مطرحها وارجع تاني أرجعها وقررت أمسكها اقطعها مزعت كل أحلامي

حطمت كل ألواني

وفرشاتي ولوحاتي وكرهت كل نجاحاتي لاقيتها لاقيتها كلها بوشين أتارى الدنيا خداعة فاتحة ف بابها شُراعة نشوف نورها نقربله نلاقى ناره تلسعنا وتشوينا على الجنبين ونقول الآه ما سمّعنا زمان قاسی ما ریّحنا وبقينا وبقينا جوه دوامة ونوا تجيبنا وتودى وموجه عاتيه قلابة

نوطیلها لجل ما تعدی تاخدنا معاها ما تسیبنا تلخبط کل ترتیبنا ولا نافع معاها قلوع وسکتها ما فیها رجوع الا

89

إلا لو قبلت الدور بدال نحلة تكون دبور والسع بدال ما تتلسوع وعيشها بطولها واتمتع قلت لأه

ومهما يميلو مش مايل ولو للحلم مش طايل حلمي ف قلبي له شايل وها يفضل أملي ف التفسير معيشني واعيشله كتير معيشني كأني أمير معيشني كأني أمير

مربعاتي

یا شفیعنا یا مُشفع
ولسلامنا منا تسمع
الزیارة لیك تمني
وقلبي مشتاقلك تمللي

یا حبیبی زاد حنینی کل ما کبرت سنینی شوقی لزیارتك یزید دی الزیارة لیك نبینا هی عندی أحلی عید

كانت الدنيا ف ظلام والجهل غطى الأنام بالرسالة جئت تسمو بكل من صلى وصام *****

حبنا ليك فريضة مش كفاية فيه قصيدة حب ربي والرسول نبع من أصل العقيدة *****

حبيت أوصف نبينا محتار أوصف ف إيه محاسن كل وصفه ووصفى قليل عليه *****

بحب الصراحة واحب الوضوح وحرفي أقوله بقلبي النصوح كلامي بسيط مالوش أي ضد وغايتي أعمر مش غايتي أهد

يا حرفي أعني أوصل رسالة كلامي يزيني ببشرى وهداية ويبقى إفادة ف دنيا ودين يتقل ميزاني يوم القيامة *****

لو شاعر صحيح شعرك يعمر وتبدر محبة ف قلبي تخضر تداوي المواجع وتنشر سماح وإيدي ف إيدك تزول الجراح

الجمال طهر النفوس مش زواق حلو ف عروس الجميلة بسوء طباع زي لقمة بدون غموس *****

> حبيبي دمه خفيف لما يكون رايق زي نسمة صيف بدلاله يتعايق وقوام يبقى خريف يزعل ويضايق *****

يا نسمة جميلة ملئتي الوجود وحمرة خجولة كاسية الخدود يا نبع التصافي لماذا التجافي ولقياك أهفو علام الصدود

نسمة حياتي عبير الزهور قصيدة آهاتي وعذب السطور

خفي الخطاوي
يا ام العيون جارحة
رمشك ناداني
وظروفي مش سامحة
النظرة منك دوا

بس الحلال أحلى *****

حيرت قلبي الغزال
بكل خطوة قلبي مال
نظرة واحدة من عنيها
ولا لمسة من إيديها
عشمتني بالغرام
بالحلال مش بالحرام

إوصل قلبك المعزول واسجد بين إيدين مولاك هتلقى للسكينة تنول ويعجل ف الجواب لدعاك

95

سعادتك في بيتك مفتاحها في إيدك تقدم مودة تلقى دلال أحلى محبة الحب الحلال *****

ولدي نصحتك والنصيحة كنوز إحرص عليها بكرة ليها تعوز صاحب الأصيل وابعد عن الأندال الدنيا لو بالمال الآخرة بالأعمال

ولدي نصحتك والنصيحة جواهر خلي المستخبي يبقى زي الظاهر ولما تيجي تصاحب صاحب الأخيار ودور على بنت الأصول لما تيجي تصاهر

خدها مني كلمة زي الماس الناس يابني ف الحياة أجناس إبن الأصول زي الدهب يضوي أما الخسيس كما الشيطان وسواس *****

السيرة الذاتية



الإسم / أحمد حامد أحمد (أحمد أبو عاصم) مواليد / القاهرة 31 /5 /1964 متزوج ولي خمسة من الأبناء متزوج ولي خمسة من الأبناء شاعر عامية ولي بعض الإجتهادات في كتابة القصة القصيرة ، وشعر الفصحى عضو رابطة شعراء العامية ، والعديد من المنتديات والمجلات الإلكترونية ، وحاصل على الكثير من المراكز الأولى وما دونها في المسابقات الشعرية . شاركت في ديوان مشترك ضمن مسلسلة إبداعات ثقافية لجمعية إبداع الثقافية. وديوان مشترك في التجمع العربي للثقافة والإبداع. وهذا هو ديواني المنفرد الأول : مخاض القصيد.

القهرس

بطاقة الكتاب
إهداء
مقدمةا
نبع حنية
خسارتك ياريف
خداع 4.
مخاص القصيد
قول يا شاعر
تمرد 0:
مجذوب 5.
كيلو بامية 9
رضاك يا اما 33
أبويا غاب
فراق
نظرة عين 01
مصارحة
نص مفقود
حبیبی یامحمد
مناعة
منك لله

60	سر الصنعة
62	ماتخافیش
64	
67	
69	إحساس
71	وجع وندم
73	آهات وأنين
74	انطلاقة
77	طول عمرنا
80	أنا إنسان
83	ماتشیلش هم
86	•
88	هیه دی مصر
92	
96	
100	پاحلم امتی تتفسر
106	
	السيرة الذاتية
115	
	······ • • • • • • • • • • • • • • • •